

INUIT ATAQATIGIIT

Inatsisartuni



Nuuk, 07.01.2019

UPA2019/171

Inatsisartut Suleriaasianni § 33 imm. 1 naapertorlugu aalajangiiffigisassatut siunnersuut imaattoq matumuuna saqqummiuppara:

Ilagiit naalagaaffiup tapersersugaasa avataatigut upperisaqatigiit allat pillugit inatsisissaq pillugu danskit Naalagaaffiup oqartussaataannut Naalakkersuisut saaffiginnequllugit peqquneqarnissaat siunertaralugu Inatsisartut aalajangiiffigisassaattut siunnersuut.

(Inatsisartuni ilaasorta, Mimi Karlsen, Inuit Ataqatigiit)

Tunnngavilersuut:

Inuiaqatigiinni inuit tamaasa pisariaqartippagut. Inuit pitsaasunik ineriartornissaminni timikkut anersaakkullu inerinneqarnissartik pisariaqartippaat. Tamannalu ilagiinni sulinertigut ineriartortitsinikkut pitsanngorsartariaqarparput. Kalaallit Nunaanni Ilagiit saniatigut allarpassuarnik upperisaqarpoq, taakkualu upperisatit aqutigalugit inuiaqatigiinni pitsanngorsaaqataasinnaanannut periarfissittariaqarparput, tassa kikkut tamarmik pitsaasunik inuiaqatigiinnut tunniussaqaarsinnaaqullugit.

Kalaallit Nunaanni qanorluunniit upperisaqarnissamut kiffaannngissuseqarpugut. Tamanna FN-ip Inuit pisinnaatitaaffii pillugit nalunaarutaanni immikkoortoq 18-mi allassimavoq.

“Kinaluunniit pisinnaatitaavoq eqqarsartaatsikkut, tarnip nalunngissusiatigut aammalu upperisakkut killilersugaannngitsunik iliorsinnaanissamut; pisinnaatitaanermi tassani aamma pineqarpoq upperisarsiornermi sorlernut ilaasuunermik upperisamillu allannngortitsinissami killilersugaannnginnissaq aammalu atuartitsinikkut, qanoq iliuuseqarnikkut, guutisiornikkut kiisalu upperisarsiornermi unnersuussutigineqartunik naammassinninniarnikkut kisimiilluni allanilluunniit peqateqarluni tamanut ammasunik namminersortumilluunniit upperisarsiornermi sorlernut ilaasuunermik imaluunniit upperisamik nalunaajaateqarnissami killilersugaannnginnissaq.”

Siunnersuut manna Kalaallit Nunaanni Ilagiinni ilaasortaannngitsut inuiaqatigiinni peqataasinnaanannut periarfissaasa ersarissarnerunissaat kiisalu pisussaaffiisa pisinnaatitaaffiisalu naaperiarnissaat pillugit saqqummiunneqarpoq.

Ullumikkutut itsillugu innuttaasut evangelisk-lutherskip avataatigut allatut upperisaqartut Kalaallit Nunaanni immikkut akuerisamik katititsinissanut, ilisinissanut allatigulluunniit upperisami ataatsimut pisinnaasutigut inatsisitigut illersugaannngillat.

Inuiaqatigiinni peqataanikinnerunissaq aqutiginngikkaluarlugu qanorluunniit upperisaqaarsinnaaneq tunnngaviummik pisinnaatitaaffiuvoq. Pisinnaatitaaffilli tamanna Kalaallit Nunaanni inatsisitigut aalajangersagaannngilaq, tassa Lov nr. 1533 af 19. December 2017 om trossamfund uden for Folkekirken jf. § 30, Kalaallit Nunaannut atuutinngimmat.

Ullumikkut kristumiussuttip iluani sammiviit arlallit nunatsinni aallunneqarput. Arlallit akuerisaasuunngillat, uppertillu qassiunersut nalunartut annerusumik minnerusumilluunniit namminerisamik oqaluffimminnut upperisaminnullu akiliisarluqut. Kalaallit Nunaanni upperisat qassiunersut nalunaarsorneqarsimasuunngillat. Upperisanut akuerisaasunut danskit ilagiinnut ministeriaata quppersagaani takuneqarsinnaasutut ilaatigut katuullit ilagiivi, Inuunerup Nutaap Oqaluffia – Grønlands Frikirke ilaapput¹.

Upperisani assigiinngitsuniittut imminnut tapersersoqatigiinnermikkut, namminerlu sulinerikkut inuppassuarnik ilaqutariippassuarnillu sullissisarput. Upperisaq aqutigalugu tulliminnik sullissineq ingerlappaat. Qujanaqisumik takusarpakka inuit ikiaroomartumik imigassamillu ajornartorsiuteqartut qaangiinarnerminni upperisarsioqatigiinniit ikiorneqartarnermikkut aniguisartut. Taama inoqatinik sullissineq qujamasunnarlunilu nersugassaavoq.

Ilagiit saniatigut upperisarsioqatigiit allat Lov om trossamfund uden for folkekirken-imi pisinnaatitaaffinni ittuni atuisinnaanerulernissaminnut periarfissaqalernissaat kissaatigaara. Taamaasilluta qanorluunniit upperisaqarsinnaanermut kiffaanngissuseqarnermut ataqqinninnerput takutissinnaanerussavarput Kalaallit Nunaannilu upperisaqatigiit innuttaasunut sullissinerat akuersorlugu.

Pisortanut aningaasatigut allaffissornikkullu kingunerisassai:

Siunnersuutip atuutilernissaani Namminersorlutik Oqartussat Lov om trossamfund uden for folkekirken-imut aalajangiffisassatut siunnersuummut akuersinissaat pisariaqarpoq. Inatsisissatut siunnersuut naalagaaffimmi oqartussanit suliarineqassaaq, Namminersorlutilli Oqartussaniit aalangiiffisassatut siunnersuutip saqqummiunneqarnissaanut aammalu naalagaaffimmi oqartussat Namminersorlutillu Oqartussat akornanni oqaloqatigeeqqaarnissamut allaffissornikkut sulisoqartoqassaaq. Tamanna ukiup sisamaraarterutaanit annerunngitsumik sulinissatut naatsorsuutigineqarpoq.

Namminersortunut aningaasaatigut allaffissornikkullu kingunerisassai:

Soqanngilaq.

Innuttaasunut aningaasatigut allaffissornikkullu kingunerisassai:

Soqanngilaq.

¹ <http://www.km.dk/andre-trossamfund/trossamfundsregistret/liste-over-anerkendte-trossamfund-og-tilknyttede-menigheder/>